

posteriorem communiter appellant *quasi-contractum*. Juristæ, e contra, utrumque vocant contractum, unum expressum et alterum tacitum: nomen autem *quasi-contractus* unice applicant obligationi ex fictione legis nascenti et fundatae naturali æquitate quæ consensum supplet, v. g.: Petro absente, ipsius domum ab incendio cum quibusdam expensis tueor; Petrus, ex *quasi-contractu*, valorem expensarum mini refundere debet.

In omni *contractu* tria a jurisperitis distinguuntur notanda, nempe *essentia*, *natura* et *accidentalia*. Ea dicuntur ad *essentialiam* *contractus* pertinere, sine quibus *contractus* non existit, vel est *contractus alterius speciei*, v. g.: ad *venditionem* tria sunt *essentialia*, scilicet, *res*, *preium* et *consensus*; una deficiente, nullus est *contractus*. Si loco pretii alia *res* detur, est *commutatio* et non *venditio*. Ea pertinent ad *naturam*, quæ, licet non expressa, ex lege, consuetudine vel æquitate, in *contractu* comprehensa intelliguntur, et tamen non *essentialiter*, v. g., *asscuratio rei venditæ*. Contrahentes hanc conditionem mutuo *consensu* excludere possent, et nihilominus *venditio* existeret: sed conventione expressa non interveniente, *vendor* rem *venditam* *asscurare* debet. Ea dicuntur *accidentalia* quæ *contractui* adjungi possunt, sed ex lege, consuetudine aut æquitate adjecta non intelliguntur, nisi aliqua interveniat *conventio specialis*, v. g., talis aut talis dilatio solutionis pretii. Vide *Toullier*, t. vi, p. 208 et seq.

Omnis nunc *contractus*, quicumque sint, sive nominati, sive *innominati*, regulis generalibus, absque ulla exceptione, *subjiciuntur*. *Cod. civ. art. 1107*.

Præsentem *Tractatum* in duas partes dividemus: in prima de *contractibus* in genere et in secunda de *contractibus* in specie disseremus.

## PARS PRIMA.

### DE CONTRACTIBUS IN GENERE.

Primæ hujus partis quinque erunt capita: 1<sup>um</sup> de *consensu* ad *contrahendum* requisito; 2<sup>um</sup> de *formalitatibus* et *nullitatibus* a lege statutis; 3<sup>um</sup> de *objecto contractuum*; 4<sup>um</sup> de *personis* quæ *contrahere* possunt; 5<sup>um</sup> de *obligatione contractuum*.

### CAPUT PRIMUM.

#### DE CONSENSU AD CONTRAHENDUM REQUISITO.

In dupli articulo dicemus 1<sup>o</sup> de *dotibus consensus*; 2<sup>o</sup> de *vitiis* quæ *consensui* nocere possunt.

#### ARTICULUS PRIMUS.

Certum est apud omnes aliquem requiri *consensum* ad *contrahendum*: nam, ex definitione, *contractus* est duorum vel plurium *conventio*: nulla autem fieri potest *conventio* absque *consensu* saltem *externo*. Ergo.

At non sufficit qualiscumque *consensus*, sed *necessus* est ut variis instruatur *dotibus*, quæ ut *pote generales* et *valde utiles*, hic *summatis* et per *ordinem exponendæ* sunt, licet quædam de his jam dixerimus in *Tractatu de Matrimonio* et alibi.

*Consensus* ergo ad *contrahendum* *requisitus* debet esse 1<sup>o</sup> *internus*, 2<sup>o</sup> *externus*, 3<sup>o</sup> *mutuus*, 4<sup>o</sup> *actualis*, 5<sup>o</sup> *plenus*.

1<sup>o</sup> *Internus*. Omnes fatentur aliquem *necessarium* esse *consensum* et quidem *interiorem*; nam *consensus* *actum voluntatis* supponit, et *percipi* non potest *vere existens*

absque voluntatis adhæsione quæ est ipse consensus. Difficultas vero est an sufficiat voluntas exterius proferringi verba intentionem contrahendi clare exprimentia, dum illa proferens dicit interius : Non contraho, contractum inire nolo, sed fingo, decipere volo.

Plures affimant hanc voluntatem ad validitatem contractus sufficere. Nam, inquit, qui vult causam, vult effectum : at consensus sic expressus est causa obligacionis, siquidem ex solo consensu illo judicatur, non vero de consensu in voluntate abscondito. Aliunde, nisi principium istud admitteretur, omnes contractus essent dubii, quia de existentia consensus interni certo constare non potest.

Alii vero communius et longe probabilius contendunt necessarium esse consensum interiorem stricto sensu ad validitatem contractus. Contractus enim est conventio; conventio autem existere non potest sine consensu voluntatum, id est sine interiori utriusque contrahentis adhæsione. In jure Romano contractus definiebatur *Duorum vel plurium in idem placitum*, etc. Vox autem *placitum* internum manifeste designat consensum. Ergo antiquis legisperitis persuasum erat interiorem necessarium esse consensum. Insuper jus quod per contractum transmittitur, a voluntate pendet : ergo per solam voluntatem transmitti potest.

*Ad rationes prioris sententiae sic responderi potest :*

- 1º Solus exterior consensus obligationem civilem facit, quia de illo tantum judicare possunt homines : at inde falso concluditur internum consensum ad validitatem contractus, pro foro conscientiae, necessarium non esse.
- 2º Ex sententia nostra non sequitur omnes contractus dubios esse : libere enim contrahentes interius consentire solent, et hoc sufficit ad securitatem. Præterea, nemo credere tenetur ei qui affirmat se interius non consenserisse, nisi veram esse suam assertionem clare manifestet, quod evidenter praestare non potest, quando exterius libere contraxit. Ergo. Hæc igitur discussio nullius est momenti quoad primum. Qui re ipsa exterius serio con-

traxisset, interius non consentiendo, alteri fecisset injuriam, quam teneretur reparare consentiendo.

Hinc contrahentes obligationem sibi imponere vel acceptare, gravem aut levem, juxta gravitatem materiæ, voluisse censentur, quia hæc voluntas ad essentiam contractus pertinet. Si quod exsurget dubium de existentia voluntatis se obligandi, expendendum est an contrahens nihilominus contraxisset, si novisset obligationem ex pacto orituram esse, an non. In priori casu judicandum est voluntatem se obligandi exstitisse et valere pactum ; in posteriori vero aliter pronuntiandum foret.

Notandum adhuc voluntatem se obligandi stare posse cum proposito contractum non adimplendi, et propositum istud validitatibus contractus non nocere.

2º *Externus.* Consensus dicitur externus quando signis sensibilibus ad extra manifestatur : talis autem, ad validitatem contractus, requiritur consensus, tum quia secus dominia forent incerta, tum quia nullus credit se obligare, quantumvis firma sit ejus voluntas, nisi eam exterius sufficienter exprimat. Necesse est ergo ut unus saltem conventionem exterius proponat. An autem pariter necesse sit ut alter exterius manifestet se consentire vel acceptare, non ita omnes admittunt. Sententia affirmans communiter tamen tenetur : si enim, uno proponente, alter nihil exterius manifestet, jus ipsius manebit dubium. Attamen in variis circumstantiis silentium est signum sufficiens acceptationis, v. g., si quis accepta re grata ab amico missa, eam nihil dicens retinet.

Varia sunt signa quibus sufficienter exprimi potest consensus ; jure naturali qualiacumque sufficiunt, etiam simplices nutus, modo ex eis innescat voluntatem assentire. At jus civile plura et diversa statuit pro diversis contractibus. Sic 1º aliquando sola requiruntur verba, ut in venditionibus, donationibus de manu ad manum, etc. 2º Aliquando scriptum necessario requiritur, ut in hypotheca. 3º In nonnullis contractibus traditio rei, de qua conventum est, necessaria est ut contractus sit in genere suo perfectus : sic mutuum, commodatum,

pignus, depositum, non perficiuntur nisi traditione rei; ante traditionem existit tantum mutui, commodati, etc., promissio. 4º In contractibus pro quibus lex positiva speciales non præscripsit formalitates, non requiruntur signa determinata: sola contrahentium voluntas obligationem producit. Si conventio juridice probari possit, vallet in foro externo; secus, nulla est in foro externo; sed in utroque casu conscientiam tenet obstrictam.

Multa numerantur signa quibus obligationis existentia juridice probari potest, scilicet scriptum authenticum, scriptum privatum inter partes (*sous seing privé*), depositio testium, perscriptio, debitoris confessio, jumentum. Admittuntur etiam scripta sine chirographo, gallice, ut melius intelligatur: « Les écrits sans signature; tels sont les livres des marchands, les écrits domestiques, comme les registres ou mémoires pour son propre usage. Il y a encore des titres qu'on appelle « *récognitifs* ou *confirmatifs*; ce sont ceux par lesquels on reconnaît et l'on confirme telle ou telle obligation, le titre qui la constitue. Les copies des titres primordiaux ou *récognitifs* sont aussi des moyens de preuves devant les tribunaux, mais ne dispensent pas d'exhiber les titres mêmes, s'ils existent. Il y a encore un moyen de preuve dont on peut faire usage et qu'on appelle *la taille*: c'est un morceau de bois fendu en deux; chacune des parties contractantes conserve l'un des morceaux, et à chaque nouvelle fourniture, on fait une coche sur les deux morceaux en même temps. Cette manière d'exprimer l'obligation est en usage chez les boulanger. »

Depositio testium non admittitur nisi agatur de summa quæ 150 fr. non excedat. *Cod. civ. art. 1341.* Ubi tamen quoddam existit probationis initium per scripta, vel si constat creditorem testimonium scriptum habere non potuisse, ut sunt ordinarie viatores, qui bona secum asportata in diversoriis deponunt, probatio per testes admittitur.

Cæterum, cum hæc signa sint tantum media quibus

existentia contractus in foro externo probari queat, de illis longius hic discurrere non expedit. Unusquisque legat, si velit, Codicem civilem ab art. 1315 ad 1369.

3º *Mutuus.* Nemo per se jus suum amittit vel alienum acquirit, nisi velit: necesse est ergo ut consensus ab uno datus, ab altero sit acceptus, ac proinde ut sit mutuus. Unde non sufficit ut consensus unius alteri innotescat, sed debet ei intimari, id est manifestari ex intentione proponentis, et ab altero sic acceptari; alioquin non esset consensus in idem *placitum*.

Quamdiu igitur consensus datus non fuit acceptatus, contractus non est firmatus, et consensus valide revocari potest, licet non semper sine peccato nec sine obligatione reparandi damaña inde provenientia; et hoc verum est etiamsi agatur de remissione debiti, nisi forsitan creditor expresse declarasset se velle omne jus absolute abjicere, ut explicat DD. *Gousset*, in art. 1282. Disputatur an vicissim necesse sit consensum acceptantis proponenti intimari. Communiter negatur pro casibus ordinariis, quia statim ac intentio unius alteri fuit intimata et ab eo exteriorius acceptata, utriusque consensus in idem placitum concurrit, quod videtur sufficiens ut vinculum obligationis existat.

Diximus pro casibus ordinariis, quia aliter contingere potest, sive ex dispositionibus legis, ut dicemus de donationibus, sive ex speciali voluntate contrahentium.

4º *Actualis.* Hic in memoriam revocanda sunt quæ in Tractatu de Sacramentis in genere diximus de intentione actuali, virtuali, habituali et interpretativa. Eodem fere modo concipitur ad contrahendum non sufficere consensum datum ex intentione interpretativa vel habituali: datum vero ex intentione virtuali sufficere; ita enim generatim apprehendunt homines, et communiter intentionis actualis diu perseverantis non sunt capaces. Consensus igitur mere præsumptus, qui revera defuit, non sufficit; sufficit vero consensus tacitus realiter existens.

Consensus ex sufficienti intentione datus, indefinite perseverat, nisi aliquo modo revocetur: quotidie enim

ineuntur contractus inter absentes et post longum temporis spatium ab expresso consensu; ergo supponitur consensum perseverare. Si autem consensus per aliquod tempus perseveret, non est ratio, ex rei natura, cur ad tale vel tale tempus limitetur. Ergo, etc.

5º *Plenus.* Communiter apprehendunt homines et docent theologi ad valide contrahendum, ex parte intellectus, eam requiri advertentiam quæ ad peccandum mortaliter necessaria est. Quod spectat ad voluntatem, distinguunt inter contractus onerosos et contractus gratuitos. Dicunt ad contractus onerosos eam pariter requiri et sufficere libertatem quæ requiritur et sufficit ad peccandum mortaliter: ad contractus vero gratuitos, qui a benevolentia procedere debent, et in quibus accipiens non dat æquivalens, requirunt consensum non tantum liberum, sed spontaneum, id est qui procedat a voluntate sine ulla rationabili repugnantia. Hoc ex dicendis in sequenti articulo magis elucidabitur.

#### ARTICULUS SECUNDUS.

##### DE VITIS QUÆ CONSENSUI NOCERE POSSUNT.

Quatuor numerantur vitia que plus minusve consensum laedere possunt, nempe error, dolus, vis seu metus, et læsio. De his in tot sectionibus dicendum est.

##### SECTIO PRIMA. — De errore.

Error generatim est aestimatio unius pro altero. Versari potest vel circa objecti naturam, v. g., si quis emat vitrum credens esse gemmam; vel circa naturam contractus, v. g., si quis domum intendat locare et alter emere eredat; vel circa qualitates rei, ut si quis equum tardum emat, putans esse velocem; vel circa pretii quotitatem, in contractibus onerosis, ut si quis putat emere 1,000 fr. quod alter credit vendere 2,000 fr.; vel circa personam, ut si quis nummum aureum Petro dare intendat et donet Paulo; vel denique circa motivum, quod triplex distingui potest, scilicet *impulsivum*, sine quo contractus fuis-

set initus, sed minus libenter; *determinans*, sine quo contractus initus non fuisset, v. g., falso credens equum meum interiisse, alterum emo; et *finale*, quod est finis contractus, v. g., persuasum habens, sine reali fundamento, patrem meum 100 fr. legasse Petro, eos solvo.

Error in genere est *substantialis* vel *accidentalis*. Dicitur *substantialis* quando substantiam contractus, sive in genere sive in specie, afficit: dicitur vero *accidentalis* quando in mera contractus accidentia cadit.

Ab omnibus, tum doctis, tum indectis, generaliter admittitur errorem substantialis omnino irritare contractum; talis quippe error consensum penitus destruit, id est impedit quin contrahentes in idem consentiant: contra vero, cum error mere accidentalis non impedit quin contrahentes in idem quoad substantiam consentiant, validitati contractus non officit. Sic ipse statuit Codex civilis, art. 1109 et 1110. Attamen, juxta sententiam communem, error accidentalis quandoque contractus gratuitos irritat: contractus enim gratuti a spontanea voluntate procedere debent, et donatarius recte conqueri non potest si frustretur re indebita, quæ non nisi cum repugnantia sibi daretur.

Hoc autem principium, recte, pro diversitate contractuum et rerum circa quas error versari potest, applicare non est facile, nec eodem modo ab omnibus aequaliter judicatur. Ante omnia necesse est ut discernatur quando error est *substantialis*, et quando reputandus est *accidentalis*: ad hoc faciendum sequentes inservire possunt regulæ.

1º Illud habendum est ut *substantialis*, cui utraque vel alterutra pars suum stricte alligat consensum: hoc autem dignoscitur tum ex verbis, tum ex consuetudine, tum ex variis circumstantiis. Si vero hæc conditio manserit mere interna, applicanda sunt quæ supra diximus ubi de consensu factio.

2º Illud censendum est *substantialis*, cuius defectus rem facit ad finem intentum inutilem: homines enim non contrahunt nisi ut inde varias percipient utilitates.

3º Illud habendum est ut substantiale, cuius defectus tollit omne motivum rationabile agendi; nam homines supponi non possunt agere sine rationabili motivo. Hinc variae prodierunt decisiones pro variis casibus, ut sequitur:

1º Error circa speciem contractus, circa naturam objecti, et, si notabilis sit, circa pretii quotitatem, omnem irritat contractum: patet ex dictis.

2º Error circa rei qualites quemlibet irritat contractum, quando consensus non praebetur nisi sub expressa vel saltem sub implicita conditione quod res talis sit qualitatis: tunc enim reipsa non adest consensus, si conditio non existat. Hinc qui jussu medici vinum Rhenarium petit, non consentit in vinum Campanum sibi exhibitum. Si, e contra, qualitas rei nec expresse, nec ex circumstantiis aut ex communi hominum aestimatione habetur ut conditio sine qua non, contractum saltem onerosum non irritat, siquidem, non obstante isto errore, remanet consensus in rem ipsam. Unde qui apud bibliopolam emit librum quem estimat bonum, et postea deprehendit malum, nihilominus valide contraxit, quia presentem librum absque restrictione voluit emere: sic pariter qui putat ducere uxorem pulchram, castam, nobilem, divitem, quae revera talis non est, validum tamen init matrimonium.

Diximus saltem onerosum, quia, cum, ex dictis, consensus in contractum gratuitum plenus esse debeat, si reipsa error circa qualitates accidentales consensum determinasset, contractus esset nullus aut daretur locus rescissioni: nec in eo casu donatarius, frustratus re sibi non debita, merito conqueri posset.

3º In contractibus onerosis error circa personam ordinarie, excepto matrimonio, non irritat contractum. Ratio est quia, ut plurimum, consideratio personæ, in hujusmodi contractibus, est indifferens. Quod equum praesentem a Petro vel a Paulo emas, quid refert? Attamen si, per exceptionem, consideratio personæ substantiam contractus afficeret, illum irritaret, v. g.: credis emere ta-

bellam a celebri pictore, puta a *Raphaele* depictam, et erras; emptio est nulla, nisi consensus tuus reipsa ceciderit in objectum praesens a te hujusmodi rerum amatore aestimatum præcipue ob qualitates quas in eo apprehendis.

In contractibus vero gratuitis, cum respectus personæ sit præcipua ratio determinans, in substantiam contractus redundant eumque irritat, ut patet. Si quandoque tamen hæc consideratio in mente donantis fuisse tantum accessoria, error validitati contractus non officeret, v. g.: das eleemosynam pauperi praesenti, quem falso creditis esse Petrum, cum sit Jacobus vere pauper, cui etiam donasses, sed non tam libenter, valet donatio.

4º Error circa motivum finale quemlibet irritat contractum; nam consensus a tali motivo substantialiter pendet, et motivo non existente, jam realiter non datur consensus. Eo sensu Codex civilis declarat, art. 1131, obligationem sine causa esse nullam. Error, e contra, circa motivum simpliciter impulsivum nullum irritat contractum, ut omnes fatentur, quia revera existit consensus. Error vero circa motivum determinans, quatenus a motivo finali distinguitur, onerosum non irritat contractum, quia consensus substantialiter existit et datur ratio rem de qua convenitum est ex utraque parte tradendi. Irritat vero contractus gratuitos, ob defectum spontaneitatis. Vide DD. *Gousset* in art. 1110.

Quamvis contractus cum errore initus in variis casibus sit nullus, nemo propria auctoritate ab illo resilire potest: expresse enim declaratur in Codice civ., art. 1117, talem contractum esse tantum rescindibilem. Illius ergo rescissio coram judicibus petenda et ab eis obtinenda est. Attamen, si probationes sufficientes juridice subministrari non possint, et nullitas sit certa, non existit obligatio pro conscientia conventionem adimplendi. Imo non videmus cur deceptus, qui solus habet jus rescissionem prosequendi, onera litis ultro suspicere teneretur. Potest ergo, nullitate supposita certa, conventioni suæ non stare et exspectare quid altera pars facere voluerit. A fortiori

contrahentes possent, tuta conscientia, ex mutuo consensu habere contractum sic initum ut non existentem.

SECTIO SECUNDA. — De dolo.

Dolus est calliditas, fallacia, aut quæcumque alia machinatio ad alterum in errorem conjiciendum adhibita, ut inducatur in contractum sibi damnosum. Contractus igitur ex dolo initus est nullus in omnibus casibus in quibus ex errore factus esset nullus. Ratio enim est eadem, scilicet defectus consensus.

In cæteris autem casibus, in quibus contractus ex errore initus est validus, valet pariter contractus ex dolo peractus, modo aliae reperiantur conditiones ad valide contrahendum requisite; sufficiens enim præbetur consensus, et aliunde jus positivum hujusmodi contractum non irritat. Ergo.

Sed quandoque ille contractus est rescindibilis, quandoque vero deceptus habet jus petendi reparationem damni per dolum sibi illati. Est rescindibilis quoties, secluso dolo, non fuisse initus; idque tum jure civili, ex art. 1116 et 1117, tum jure naturali; unusquisque enim habet jus naturale liberandi, examinandi, varia pensandi motiva antequam contrahat: qui ergo dolo erga eum utitur ut consensum ejus obtineat, illi facit injuriam quam ex justitia tenetur etiam ante sententiam judicis reparare: eam autem convenienter reparare non potest, nisi plenam illi reddendo libertatem. Ergo talis contractus rescindibilis est ad nutum partis læsæ.

Ex eadem ratione patet decipientem non habere jus a contractu resilendi.

Quando autem injuria aliter quam per rescissionem reparari potest, deceptus habet tantum jus exigendi ut damnum quod passus est sibi resarciatur.

Si dolus a tertio inferatur, absque participatione contrahentis, contrahens non tenetur consentire rescissioni, nec damnum illatum reparare, modo servetur æqualitas, sicut in omni alio contractu oneroso. Art. 1116.

Decipiens autem, quicumque sit, semper tenetur in

conscientia omnia compensare damna ex ipsius machinatione provenientia, siquidem omnia ei tribuenda sunt.

SECTIO TERTIA. — De vi et metu.

Vis est motio a principio extrinseco contra voluntatis inclinationem nobis impressa. Metus est trepidatio mentis ob malum imminens. Duo igitur importat, nempe periculum mali et trepidationem mentis. Multiplex distinguitur, scilicet:

1º Alius est gravis et alias levis: gravis est ille quo timetur malum grave et probabiliter imminens, v. g., mors, mutilatio, incarceratio, bonorum amissio; levis ille est quo timetur malum leve aut grave, sed improbabile.

2º Metus iterum potest esse gravis absolute vel respective: est gravis absolute, quando in quemcumque virum fortis cadere potest, ut metus mortis et incarcerationis diuturnæ; respective gravis ille dicitur quo movetur puer, mulier, aut vir meticulosus, et quo vir fortis et constans minime afficeretur. Sic metus quorundam baculi ictuum potest esse gravis respectu puellæ, et levissimus respectu militis assuefacti bellis.

3º Metus oriri potest a principio intrinseco, vel a principio extrinseco. Oritur a principio intrinseco, quando procedit a causa intrinseca ei qui timore movetur, v. g., a morbo; est autem a principio extrinseco, quando excitatur a causa extrinseca ei qui timore percillitur.

4º Metus a principio extrinseco dupli modo incuti potest, videlicet a causa necessaria, v. g., naufragio, et a causa libera, id est, ab homine.

5º Metus a causa libera proveniens duplicem ob rationem incuti potest: ob rationem justam, cum ille per quem inculitur legitimam habet potestatem inferendi malum quod minatur, v. g., si judex minis reum cogat ad confitenda crima de quibus fere est convictus, vel ad complices revelandos: inquitur autem ob rationem injustam, quando ille qui malum minatur, legitimam non habet potestatem illud infligendi, ut si latro in via mortem viatori minitet nisi crumenam ipsi tradat.

6º Metus denique incuti potest vel directe ad obtinendum contractum, vel ad alium finem a contractu distinctum, v. g., ad ulciscendam injuriam : quibus positis,

*Certum est* 1º metum ex omni parte levem, id est ratione tum mali formidati, tum trepidationis mentis, contractum per se non irritare; consensum enim non destruit. Multi tamen notant quandoque fieri posse ut metus etiam levis det causam contractui : tunc reddit contractum saltem rescindibilem. In foro externo, ubi malum leve est, metus semper reputatur levis et nullam dat actionem adversus contractum.

*Certum est* 2º metum gravem prorsus dirimere contractum, si hoc usque veniat ut rationis usum tollat, vel incapacem peccandi mortaliter reddat, cum tunc sufficiens consensus praebeti nequeat.

*Certum est* 3º metum gravem a causa intrinseca, aut a causa extrinseca, sed necessaria, incussum, quo stante homo remanet sui compos, contractum non dirimere; non tollit enim libertatem, nec ullam infert injuriam ei qui propter hujusmodi metum ad contractum sese determinat.

*Certum est* 4º metum a causa libera et extrinseca, sed justa, incussum, non irritare contractum; non impedit enim quin verus praebatur consensus, et qui propter hunc metum agit, conqueri non potest injuriam sibi inferri. Unde qui metu alicujus mali ducit pueram quam sub promissione matrimonii defloravit, valide contrahit.

*Certum est* 5º apud auctores communiter metum gravem a causa injusta incussum contractus *gratuitos* semper irritare: talis quippe metus impedit quin consensus procedat ex perfecto voluntario ad actus liberalitatis requisito.

6º Metus a causa extrinseca, libera et injusta incussum, sed ob finem a contractu diversum, contractum non dirimit; nam si illum dirimeret, vel propter defectum liberalitatis requisitae, vel propter injustitiam: atqui neutrum dici potest; non propter defectum liberalitatis, cum usus rationis non tollatur; non propter injustitiam, siquidem

metus, ut supponitur, in ordine ad contractum non fuit incussum: contrahens igitur proprio motu sese determinavit. Unde aliquis grave malum injuste tibi inferre paratus est; equum tuum quem cupit, de quo tamen non loquitur, vendere illi proponis et de pretio æquivalenti convenitis; valet contractus.

An autem contractus tunc sit rescindibilis, non sibi consentiunt auctores. Probabilior videtur sententia affirmans, saltem si metus ab altero contrahente incutiatur: qui enim metum injuste incutit, injuriam facit; hanc injuriam reparare debet; illam vero convenienter reparare non potest, nisi perfectam reddendo libertatem ei qui metu fuit determinatus. Ergo.

Si metus a tertia persona fuerit incussum, res maxime pendet a circumstantiis ex quibus judicandum est an contrahens fructum ex injustitia percepturus sit, an non.

At si contractus haberet pro objecto cessationem ab injusta vexatione, jure naturali esset nullus; in contractibus enim onerosis aliquid pretio æstimabile ex utraque parte dari debet: atqui cessatio ab injusta vexatione non est pretio æstimabilis ex parte vexantis, qui certe hanc cessationem vendere non potest. Ergo quidquid accepisset, ex justitia reddere teneretur. Ita *Collet*, conc. 4 de Metu; *Billuart*, ibid. et communiter theologi.

Hinc latro mortem ex ira viatori parat, nihil ab illo postulans; viator, timore perculsus, summam pecuniae illi promittit ut ab ejus manibus sese eripiat, contractus est nullus. At si viator oppressus transeuntes advocaverit, et pecuniam illis promiserit ut ipsum a periculo liberarent, valet promissio; dant enim aliquid pretio æstimabile, nempe auxilium quod præbent. Ita *Puffendorf*, l. 3, cap. 6, § 11; *Pothier*, P. *Antoine*, *Collet*, etc.

7º Quæstio superest an metus gravis a causa injusta ad extorquendum consensum in contractum incussum, illum efficiat jure naturali nullum; non convenient inter se doctores. Plures enim volunt omnes hujusmodi contractus esse jure naturali validos; nam verus non de est consensus, *voluntas coacta est voluntas*: sunt verba

juris Romani. Ergo. Ita *Grotius*, lib. 2, c. 9. Juxta hunc auctorem, contractus ex gravi metu iniustus, est jure civili tantum rescindibilis. Alii autem contendunt hos contractus jure naturali esse irritos, quia injuste ad id cogeneremur faciendum quod a libera electione nostra pendet. Ergo. *Puffendorf*, lib. 3, cap. 6, § xi; *Barbeyrac*, ibid.; *Pothier*, n. 423, et plures alii. Omnes fatentur hujusmodi contractus esse jure naturali rescindibiles.

Alii denique distinguunt inter contractus qui habent pro objecto solam ab injusta vexatione cessationem, et alios in quibus aliquid pretio aestimabile utrinque datur et accipitur. Dicunt priores esse nullos, et posteriores esse jure naturali validos, sed rescindibiles. Hæc opinio probabilior nobis videtur, et sic probatur.

1º Contractus qui habent tantum pro objecto solam ab injusta vexatione cessationem, sunt jure naturali nulli: patet ex modo dictis.

2º Contractus in quibus aliquid pretio aestimabile utrinque datur et accipitur, sunt validi; si enim essent nulli, vel defectu materiæ sufficientis, vel defectu consensus requisiti: atqui neutrum dici potest. Non defectu materiæ sufficientis, cum ex hypothesi aliquid pretio aestimabile utrinque detur et accipiatur; non defectu consensus requisiti, siquidem contrahens remanet sui compos. Ergo.

Verum hæc opinio quoad præxim a præcedenti non discrepat; qui enim per metum injuste incussum ad contrahendum sic fuit adductus, veram passus est injuriam, illiusque sufficientem reparationem stricte exigere potest: atqui sufficienter illa injuria non reparatur, nisi perfecta contrahenti reddatur libertas: porro si perfecta ei debeatur libertas a contractu resilendi, ipse contra justitiam non peccabit resilendo. Ergo, re adhuc integra, promissione suæ stare non tenetur. Si vero contractus per traditionem rei sit consummatus, illius rescissionem coram judicibus postulare potest; idque verum est, sive metus ab altero contrahente incusus fuerit, sive ab alio tertio; sive malum quod timetur contrahenti immineat, sive

eius conjugi, descendantibus, aut ascendentibus. *Cod. civ. art. 1111, 1112, 1113*. Imo si malum aliis propinquuis vel amicitia conjunctis immineat, ita ut trepidationem mentis in contrahente pariat, eumque ad contrahendum inducat, jure naturali, ac proinde in conscientia, rescindibilis est contractus. Idem dicendum est si malum immineat, non quidem personis, sed earum fortunæ, ut supponit articulus 1112 Codicis.

Metus reverentialis, sic dictus ob reverentiam quibusdam personis, patri, v. g., vel matri debitam, per se contractum non reddit vitiosum, nec efficit quidem ut rescindi queat, *Cod. civ. art. 1114*; secus, si cum verberibus aut aliis violentiæ signis jungeretur; fieret enim tunc metus gravis.

Ita quidem lex pro foro externo statuit. At in foro interno, si metus reverentialis multum moveat mentem, etiam absque verberibus et violentiæ actibus, reducitur ad metum gravem et ei applicanda sunt quæ diximus de metu gravi quoad conscientiam. Codex civilis hoc aliquatenus supponit articulo 1112 jam citato, dicendo rationem habendam esse atatis, sexus et conditionis.

Cæterum, qui per metum injustum, sive gravem, sive levem, cuius auctor, vel particeps fuit, aliquem in contractum adduxit, tenetur in conscientia et ante judicis sententiam totum resarcire damnum quod illi intulit; quisquis enim tenetur reparare injuriam cuius est auctor.

Cum autem ille contractus jure naturali sit validus, præter quosdam casus a nobis assignatos, sed tantum rescindibilis, sequitur eum solum rescissionem petere posse, qui propter metum contraxit, siquidem solus injuriam passus est: si ergo contractui stare velit, alter in foro externo resilire non potest, nec etiam in foro interno, sive particeps fuerit metus, sive non.

#### SECTIO QUARTA. — De læsione.

Læsio in eo consistit quod in contractibus onerosis aequalitas non servetur, sed plus accipiatur quam tradatur, sive id fiat ex errore, sive ex dolo.

Simplex læsio contractum non reddit jure naturali nullum, siquidem verus præstatur consensus; nec rescindibilem, siquidem, ut supponitur, nulla fuit injuria, sed tantum defuit æqualitas, quæ absque rescissione restitui potest. Qui ergo plus accipit quam dedit, excessum restituere debet, et insuper, si læsio ex dolo proveniat, totum tenetur reparare damnum inde secutum: quod quidem verum est de quibusvis contractibus et personis, etiam de minoribus.

*Observandum est* autem justum rerum pretium non consistere in aliquo punto mathematice determinato, sed varios suscipere gradus ex prudentium hominum judicio æstimandos, habita scilicet ratione circumstan-tiarum, temporum, penuria vel abundantiae rerum aut pecuniæ, emptorum et vendentium. Dum pretium inter hujusmodi gradus sistitur, læsio adesse non judicatur: hinc infimo pretio emere et summo vendere licet.

Ex jure civili in nonnullis contractibus, et erga quasdam personas, læsio est causa sufficiens cur rescissio peti ac obtineri valeat. *Cod. civ. art. 1118.*

Sic 1º læsio quartam excedens partem in partitione hæreditatis, communitatis conjugalis, aut societatis commercialis, nisi alter velit læso solvere supplementum suæ partis et damna compensare. *Art. 887, 1476, 1872 et 891.*

Sic 2º in venditione boni immobilis, quod alienari potest absque auctoritate judicis, læsio excedens septem partes ex duodecim dat locum rescissioni in favorem solius vendoris, nisi emptor solvat supplementum justi pretii sub deductione decimæ partis pretii totalis. *Art. 1674, 1683 et 1684.*

Rescissio nunquam conceditur propter læsionem in bonis mobilibus, et quidem merito; cum enim haec bona multipliciter de manu ad manum transeant, valde interest ut eorum venditiones sint firmæ et rescindi nequeant, ne plurimis turbationibus detur locus. In foro interno si æquitas naturalis læsa fuerit, reparanda erit. Idem dicendum est in variis conventionibus quas lex excipit, v. g., art. 889, 1706, 2052.

Sic 3º quæcumque læsio etiam levissima sufficit ut minores rescissionem obtainere possint. *Cod. civ. art. 1304.* Si sint emancipati, in actibus ad quos inhabiles sunt, æquiparantur minoribus non emancipatis; in aliis vero, majoribus. Facultas autem rescissionem ob læsionem petendi per decem existit annos, nisi aliter statuatur. *Art. 1404.* Variæ sunt exceptiones sub diversis titulis expressæ.

## CAPUT SECUNDUM.

### DE FORMALITATIBUS ET NULLITATIBUS A LEGE STATUTIS.

Certum est contractus regendos esse non solum lege divina naturali aut positiva, sed etiam lege humana. Non hic agemus de lege ecclesiastica, quæ sane quosdam contractus, non solum prohibere, sed et irritare potest, ut matrimonium. Loquemur tantum de lege civili, abstrahendo a matrimonio, quod specialibus subest difficultibus alibi discussis.

Apud omnes constat dari posse leges civiles, quæ sive absolute, sive sub quibusdam conditionibus quosdam prohibeant contractus, ut pote civibus vel societati noxios, et in conscientia obligent.

Omnis similiter admittunt legislatores irritare posse contractus pro foro externo, cum certis destituuntur formis: imo, plerique consentiunt irritationem fieri posse etiam pro foro interno, saltem post sententiam judicis, quia haec potestas ad bonum societatis videtur necessaria.

An autem haec irritatio valere possit in conscientia etiam ante omnem judicis sententiam, non ita omnes concordant. Cum plerisque affirmandum esse putamus; nam suprema civilis potestas, quando attingit materiam sibi subjectam, alios non agnoscit limites quam justitiae et æquitatis: potest quidquid ex una parte non est ini-